


MISA CON NENOS

28 de maio de 2017 - PASCUA ASCENSIÓN-A

Mt 28, 16-20: "Ide. Eu estou convosco".

Mensaxe: ASCENSIÓN: Cristo VAISE ao ceo ... Necesítate aquí como
TESTEMUÑA!



**ASCENSIÓN: Cristo VAISE ao
CEO...**

**Necesítate aquí como
TESTEMUÑA**

1. ACOLLIDA

Irmáns e irmás, queridos nenos e nenas: Celebramos a festa da Ascensión de Xesús ao ceo.

Hoxe, aquel home que naceu Neno en Belén; aquel que curou a enfermos e acompañou os tristes; aquel que curou feridas e que subiu á cruz; aquel que, ao terceiro día resucitou ... HOXE SOBE AOS CEOS!



É esta unha festa de grande alegría. Xesús, ao entrar no ceo, deixa unha porta aberta pola que nós tamén entraremos un día a formar parte desa familia.

Xesús vaise ao ceo e agora é a nosa quenda. Nós temos que levar a cabo a misión de Xesús, continuando a tarefa, o traballo que Xesús comezou: Anunciar a Boa Noticia e **ser testemuñas** do amor de Deus. Desde o ceo acompáñanos para que non esquezamos ir polos camiños que El nos marcou. Sede benvidos. **(Colocamos en lugar visible: “Sede as miñas testemuñas. Eu estou convosco”)**.

-No nome do Pai ... A graza, o amor e a paz de Xesús resucitado, sexa convosco.

2. PERDÓN ou ASPERSIÓN

Recoñezamos os nosos pecados:

-Ti que te vas ao ceo e nos encomendas a misión de ser as túas testemuñas. **Señor, ten piedade!**

-Ti que estás sempre connosco e nunca nos deixas sos. **Cristo, ten piedade!**

-Ti que nos dás o teu Espírito que nos fortalece e nos anima a ser dos teus. **Señor, ten piedade!**

Polo bautismo unímonos á morte e resurrección de Xesús. Agora, coa aspersion da auga, recordaremos aquel momento e reafirmaremos a nosa vontade de seguilo. **(Aspersion e canto bautismal)**.

Que o Deus da misericordia nos purifique do pecado e, pola celebración da eucaristía, nos faga dignos de participar do banquete do seu Reino. Amén.

3. PALABRA DE DEUS

As lecturas de hoxe seguen tendo sabor a Espírito Santo. Dentro de poucos días celebraremos a gran Pascua de Pentecoste. No libro dos Feitos nárrasenos como os apóstolos foron testemuñas da súa partida deste mundo, logo de asegurarlles que recibirían a forza do Espírito para continuar a súa misión. San Paulo recórdanos a riqueza á que estamos chamados do mesmo xeito que Xesús a quen o Pai sentou á súa dereita no ceo. No evanxeo, Xesús envíanos a ser as súas testemuñas pero teñamos a seguridade de que el vai connosco.

LECTURAS

FEITOS 1,1-11: *Á vista deles, foi levado ao ceo.*

No meu primeiro libro, Teófilo, escribín de todo o que Xesús fixo e ensinou desde o comezo ata o día en que foi levado ao ceo, logo de dar instrucións aos apóstolos que había escolleito, movido polo Espírito Santo. Presentóuselles el mesmo logo da súa paixón, dándolles numerosas probas de que estaba vivo, aparecéndoselles durante corenta días e falándolles do reino de Deus.

Unha vez que comían xuntos, ordenoulles que non se afastasen de Xerusalén, senón: *«agardade que se cumpra a promesa do Pai, da que me oístes falar, porque Xoán bautizou con auga, pero vós sereis bautizados con Espírito Santo dentro de non moitos días»*. Os que se reuniron, preguntáronlle, dicindo: *«Señor, é agora cando vas restaurar o reino a Israel?»*. Díxolles: *«Non vos toca a vós coñecer os tempos ou momentos que o Pai estableceu coa súa propia autoridade; en cambio, **recibiredes a forza do Espírito Santo que vai vir sobre vós e sereis as miñas testemuñas en Xerusalén, en toda Xudea e Samaría e “ata o confín da terra”**»*. Dito isto, á vista deles, foi elevado ao ceo, ata

que unha nube llo quitou da vista. Cando miraban fixos ao ceo, mentres el íase marchando, presentáronselles dous homes vestidos de branco, que lles dixeron: «*Galileos, que facedes aí plantados mirando ao ceo? O mesmo Xesús que foi tomado de entre vós e levado ao ceo, volverá como o vistes marcharse ao ceo*».

Palabra do Señor.

SALMO 46:

Deus ascende entre aclamacións; o Señor, ao son de trompetas.

EFESIOS 1, 17-23:

Sentouno á súa dereita no ceo.

MATEU 28,16-20:

Déuseme pleno poder no ceo e na terra.

Narrador: Naquel tempo, os once discípulos foron a Galilea, ao monte que Xesús lles indicara. Ao velo, eles prostráronse, pero algúns dubidaron. Achegándose a eles, Xesús díxolles:

Xesús: -«*Déuseme todo poder no ceo e na terra. Ide, pois, e facede discípulos a todos os pobos, bautizándoos no nome do Pai e do Fillo e do Espírito Santo; ensinándolles a gardar todo o que vos mandei. E sabede que eu estou convosco todos os días, ata o final dos tempos*».

Palabra do Señor.

(Narrador - Xesús).

4.- ORACIÓN DA COMUNIDADE

Unidos a Xesús, pidamos ao Pai que envíe o seu Espírito e nos renove, dicindo:

-Fainos as túas testemuñas, Señor.

- 1.- Pola Igrexa para que viva chea do gozo do Espírito e saiba transmitilo ao mundo. **Oremos.**
2. Polos que cada domingo participamos na Eucaristía, para que vivamos con ilusión e radicalidade a tarefa de ser testemuñas de Xesús no medio dos nosos familiares e amigos. **Oremos.**
3. Polos que perderon a fe, a confianza en Xesús, para que sintan a súa proximidade e o seu amor. **Oremos.**
4. Polos que viven preocupados dos negocios e afáns cotiáns, para que non se esquezan das cousas de Deus. **Oremos.**
5. Por todos nós para que esteamos dispostos a continuar a misión de construír o reino de Deus. **Oremos.**
6. Para que transmitamos aos outros a ledicia que supón crer en Xesús. **Oremos.**
7. Por todos os nenos e nenas que estes domingos reciben a primeira comunión ou a confirmación, para que continúen participando cada domingo na Eucaristía cos seus pais. **Oremos.**

Escoita, Pai, a nosa oración, e envía o Espírito Santo que prometiches, para que encha coa súa graza os nosos corazóns e renove a humanidade enteira. Por Xesucristo, noso Señor.

5. PRESENTACIÓN DE DONES *(eliximos)*

- UNHA BIBLIA:

Ofrecémosche, Señor, esta Biblia, onde se atopa a túa mensaxe de salvación, con ela ofrecémosche, ao final do curso, o traballo dos nosos sacerdotes, catequistas e profesores de relixión que se esforzan en ser apoio para nós e testemuñas da verdade.

- UNHA MEDALLA DE COMPETICIÓN:

Os grandes deportistas, cando gañan, soben ao podio, ao estrado do triunfo. Xesús non soamente saíu triunfador sobre a morte, ademais, hoxe é colocado xunto a Deus polo ben que fixo todo e, sobre todo, por cumprir o plan de Deus. Que El nos axude agora a nós.

- LADRILLO, AREA E PALETA:

Con este ladrillo, area e paleta, queremos dicirlle ao Señor que agora nos toca a nós. Que nos axude a seguir construíndo o seu Reino. A traballar pola súa Igrexa. Que contamos con El para que, o Evanxeo, sexa levado e coñecido en moitos lugares do noso planeta.

- O PAN E O VIÑO:

Sen a Eucaristía, a nosa vida cristiá, sería moi frouxa. Que Xesús, desde o ceo, veña todos os días, todos os domingos ata este altar e, así, sexa o alimento que dea vigor ás nosas almas para que un día poidamos gozar con El no ceo.



Xesús non ten mans

Xesús agora non ten **mans**, por iso necesita as nosas mans para facer o ben a todos.

Xesús agora non ten **pés**, por iso necesita os nosos pés para camiñar á beira dos homes e sinalarlles o camiño que leva a Deus.

Xesús agora non ten **beizos**, por iso necesita os nosos beizos para bicar a todos e amosar a todos o grande amor de Deus.

Xesús agora non ten **mans**, por iso necesita que lle botemos unha man para perdoar a todos, para que creza o seu Reino e sexamos coma el o sal e a luz do mundo.

Agora tócanos a nós ser Xesús na terra.

Posible acción de grazas

Xesús necesitamos

Xesús, todo o tempo de Pascua foi unha bela e alegre experiencia de sentir a túa presenza, de atoparte na comunidade que se reúne o domingo, para comer o teu Pan na Eucaristía.

Pero a túa Ascensión ao ceo fainos volver á realidade. Somos nós os que te temos que facer presente no mundo aínda que polo milagre do amor segues entre nós.

Xesús, é a hora das testemuñas, dos que dan a cara por ti, dos valentes, dos que se lles nota en cada palabra e en cada xesto que te seguen.

Axúdanos, Xesús, a ser as túas testemuñas no mundo, vivindo a ledicia do evanxeo, formando comunidade, servindo na túa Igrexa, construíndo o teu reino de irmáns, sementando alegría e esperanza.

Dáanos o teu Espírito, Señor, que alente o noso testemuño, así un día tamén nós, teremos un lugar nalgún recuncho dese inmenso ceo, onde festexaremos unidos a grandeza de Deus.



RED CATEQUISTAS GALICIA